



**REPUBLIKA E SHQIPËRISË**  
**Kuvendi**

**PROJEKTLIGJ**

Nr. \_\_\_\_\_, datë \_\_\_\_\_

**PËR**

**BURIMET E ENERGJISË SË RINOVUESHME**

Në mbështetje të neneve 78 dhe 83, pika 1, të Kushtetutës, me propozimin e Këshillit të Ministrave, Kuvendi i Republikës së Shqipërisë

**V E N D O S I:**

Miratimin e projektligjit “Për burimet e energjisë së rinovueshme”, si më poshtë vijon:

**KAPITULLI I**  
**DISPOZITA TË PËRGJITHSHME**

**Neni 1**  
**Qëllimi**

Qëllimi i këtij ligji është:

- a) të ndihmojë në përdorimin ekonomik të burimeve natyrore dhe zhvillimin e qëndrueshëm në Republikën e Shqipërisë;
- b) të nxitë përdorimin e teknologjive dhe novacioneve për prodhimin e energjisë elektrike dhe nxehtësisë nga burime të rinovueshme energjie, për të siguruar një zhvillim të qëndrueshëm të vendit;

- c) të zvogëlojë importin e lëndëve djegëse organike, të zvogëlojë gazet me efekt serrë dhe të mbrojë mjedisin, në zbatim të detyrimeve ndërkombëtare të Shqipërisë nga marrëveshjet dhe traktatet ndërkombëtare të energjisë;
- ç) të rritë llojshmërinë e përdorimit të burimeve të energjisë dhe sigurinë e furnizimit me energji në Republikën e Shqipërisë;
- d) të nxitë zhvillimin e tregut të brendshëm të energjisë dhe integrimin e tij në atë rajonal;
  - dh) të rritë numrin e prodhuesve të pavarur të energjisë dhe të nxitë zhvillimin e ndërmarrjeve të vogla e të mesme;
  - e) të nxitë zhvillimin rural dhe të zonave të izoluarra, duke përmirësuar furnizimin me energji të këtyre zonave.

## **Neni 2**

### **Objekti**

Ky ligj përcakton:

- kuadrin ligjor për nxitjen e prodhimit të energjisë nga burimet e rinovueshme të energjisë;
- objektivat kombëtarë të detyrueshëm për kontributin e burimeve të rinovueshme në konsumin përfundimtar bruto të energjisë;
- përparësinë e lidhjes në sistemet e rrjetit të energjisë elektrike të centraleve, që përdorin burime të rinovueshme energjie brenda territorit të Republikës së Shqipërisë;
- përparësinë e blerjes dhe pagesës nga blerësi të energjisë elektrike të energjisë së prodhuar nga burimet e rinovueshme të energjisë;
- kuadrin ligjor për procedurat e autorizimit, licencimit dhe të plotësimit të kërkesave për marrjen e lejeve përkatëse;
- rregullat për garancinë e origjinës, koordinimin e kërkesave për licencimin dhe lejet;
- mënyrat e nxitjes së përdorimit të sistemeve për ngrohjen e ujit nga energjia diellore;
- kuadrin ligjor për përdorimin e energjisë së burimeve të rinovueshme për transport.

## **Neni 3**

### **Përkufizime**

1. Për fjalët dhe termat, që nuk janë përmendur shprehimisht në listën e përkufizimeve të përfshira në pikën 2, të këtij neni, referencë do t'u bëhet termave dhe përkufizimeve të përcaktuara në ligjin "Për sektorin e energjisë elektrike".

2. Për qëllime të këtij ligji, do të zbatohen përkufizimet e mëposhtme, me të cilat nënkuptohet:

- **“Biokarburant”**, lënda djegëse, në trajtë të lëngët ose të gaztë, e prodhuar nga biomasat, për t’u përdorur në sektorin e transportit.
- **“Biogaz”**, lënda djegëse e gaztë, e prodhuar nga biomasat ose nga shpërbërja e mbeturinave organike, industriale dhe urbane, të shpërbëshme biologjikisht, të cilat mund të pastrohen dhe të përmirësohen deri në cilësinë e gazit natyror, për t’u përdorur si biokarburant, si dhe gazi me prejardhje nga drutë e zjarrit.
- **“Biolëngje/lëndë djegëse e lëngët nga biomasat”**, lëndë djegëse të lëngëta, të prodhuara nga biomasa, që përdoren për qëllime të ndryshme nga transporti, të prodhimit të energjisë elektrike, termike në formën e nxehtësisë (temperatura të larta) ose tëftohtit (temperatura të ulëta).
- **“Blerës i energjisë elektrike nga burimet e rinovueshme të energjisë”**, subjekti përgjegjës për blerjen e energjisë elektrike nga burime të rinovueshme të energjisë, sipas neneve të parashikuara në kete ligj dhe ne ligjin “Për sektorin e energjisë elektrike”.
- **Biomasa**, pjesa e biodegradueshme e produkteve, mbeturinave dhe mbetjeve nga veprimtaria bujqësore (përfshirë lëndë bimore dhe shtazore), pyjore dhe nga industri të lidhura me to, si edhe pjesa e biodegradueshme e mbeturinave industriale, urbane dhe rurale.
- **“Central”**, të gjitha pajisjet dhe sistemet e një centrali gjenerues të energjisë elektrike dhe të nxehtësisë, që shfrytëzojnë burimet e rinovueshme të energjisë.
- **“Central elektrik termik me disa lëndëdjegëse”**, çdo central që prodhon energji elektrike ose nxehtësi apo centrale, që punojnë me një ose më shumë lloje të lëndëve djegëse, nga të cilat të paktën njëri është burim i rinovueshëm energjie. Centralët elektrike termike që nuk përdorin asnjë lëndë djegëse ose energji nga burime të rinovueshme energjie, nuk kualifikohen si centrale elektrike termike me disa lëndë djegëse, sipas këtij ligji.
- **“Energjia e mjedisit të jashtëm”**, energjia e akumuluar në formë nxehtësie në ajrin e mjedisit të jashtëm.
- **“Energjia e prodhuar nga burime të rinovueshme të energjisë”**, energjia e prodhuar nga centrale, që përdorin vetëm burime të rinovueshme energjie dhe jo lëndë djegëse, të emëtuara si energjia hidrike, energjia e erës, energjia diellore, energjia e ajrit të mjedisit të jashtëm, energjia gjeotermike, energjia hidrotermike, në të cilën përfshihet edhe energjia e valëve të detit, energjia e baticës dhe zbaticës, si dhe energjia e mbetjeve urbane e atyre industriale, të përbërësve të tyre të shpërbëshëm.

- **“Energjia elektrike e prodhuar nga burime të rinovueshme energjie”**, energjia elektrike e prodhuar nga centrale elektrike, të cilat përdorin ose vetëm burime të rinovueshme të energjisë, ose një pjesë të burimeve të rinovueshme të prodhuar në centralet, që punojnë me disa lëndë djegëse, përfshirë dhe ato konvencionale dhe që përfshijnë në to sasinë e energjisë së rinovueshme për mbushjen e rezervuarëve grumbullues të sipërm të hidrocentraleve me pompa dhe përjashtojnë energjinë elektrike të prodhuar si rezultat i mbushjes së rezervuarëve të sipërm të grumbullimit.
- **“Energjia e faturuar”**, sasia e energjisë që i korrespondon një centrali prodhues dhe është e barabartë me:
  - a) sasinë e energjisë së prodhuar, në rastet kur vlerësimi i cilësisë së shërbimit nga ana e rrjetit nuk përfshihet në kontratën e shitblerjes së energjisë dhe në marrëveshjen e lidhjes me rrjetin;
  - b) energjinë e prodhuar, e cila është korrigjuar në përputhje me vlerësimin e cilësisë së shërbimit nga ana e rrjetit, kur kjo e fundit është përfshirë në kontratën e shitblerjes së energjisë dhe në marrëveshjen e lidhjes me rrjetin.
- **“ERE”**, shkurtimi i emërimit të Entit Rregullator të Energjisë, siç përkufizohet në ligjin “Për sektorin e energjisë elektrike”.
- **“Garancia e origjinës së energjisë elektrike”**, dokumenti elektronik, i cili ka vetëm një funksion, atë të vërtetimit se sasia ose një pjesë e caktuar e energjisë elektrike të prodhuar është prodhuar në një central me një kapacitet prodhues të përcaktuar dhe që përdor burime energjie të rinovueshme, sikurse është përcaktuar në ligjin për sektorin e energjisë elektrike.
- **“Impiant koogjenerimi”**, një central, që prodhon njëkohësisht energji elektrike dhe termike, duke përdorur një lëndë djegëse të vetme, që mund të jetë gaz natyror apo biomasë.
- **“Kapaciteti, fuqia e instaluar”**, sasia e energjisë që mund të prodhohet në njësinë e kohës nga një central elektrik. Fuqia neto e prodhuar (energjia neto në njësinë e kohës) zvogëlohet me vlerën e humbjeve në elemente të ndryshem të centralit.
- **“Kapacitet ose fuqi gjeneruese”**, kapaciteti ose fuqia efektive e energjisë elektrike, që mund të realizojë një central gjatë operimit të rregullt pa kufizime, pavarësisht nga ndryshimet në periudha të shkurtra kohe.
- **“Kontrata e lidhjes me rrjetin”**, kontrata e nënshkruar ndërmjet një prodhuesi dhe operatorit të sistemit të rrjetit, me qëllim që të bëjë të mundur lidhjen e centralit me Rrjetin Elektrik Kombëtar.
- **“Konsumi përfundimtar bruto i energjisë”**, e gjithë sasia e energjisë e furnizuar si e tillë për industrinë, transportin, për sektorin familjar, për shërbimet e ndryshme, përshirë shërbimet, publike dhe private, bujqësinë, pyjet dhe peshkimin, përfshirë konsumin e energjisë elektrike dhe të

nxehtësisë edhe për autokonsum në të gjithë sektorët e energjetikës, si dhe humbjet e energjisë elektrike dhe të nxehtësisë në sistemin e prodhimit, transmetimit dhe shpërndarjes.

- **“Ligji për krijimin e kapaciteteve të reja prodhuese”**, ligji “Për krijimin e lehtësirave për ndërtimin e kapaciteteve të reja prodhuese”, i cili është aktualisht në fuqi dhe çdo ndryshim i tij në të ardhmen.
- **“Ligji për eficientë e energjisë”**, ligji “Për eficientë e energjisë”, i cili është aktualisht në fuqi dhe çdo ndryshim i tij në të ardhmen.
- **“Ligji për sektorin e energjisë elektrike”**, ligji “Për sektorin e energjisë elektrike”, aktualisht në fuqi dhe çdo ndryshim i tij në të ardhmen.
- **“Ligji për prodhimin, transportimin dhe tregtimin e biokarburanteve”**, ligji nr.9876, datë 14.2.2008, “Për prodhimin, transportimin dhe tregtimin e biokarburanteve dhe lëndëve të tjera djegëse, të prodhuara nga biomasat për sektorin e transportit”, i cili është aktualisht në fuqi dhe çdo ndryshim i tij në të ardhmen.
- **“Marrëveshje për blerjen e energjisë elektrike”**, marrëveshja “tip” e miratuar nga ERE-ja, ndërmjet blerësit të energjisë elektrike nga burimet e rinovueshme të energjisë dhe prodhuesit që ka perparesi për blerjen e energjisë elektrike, të prodhuar nga një central ose impiant i prodhimit të energjisë.
- **“Ministria përgjegjëse për energjinë”**, aktualisht Ministria e Ekonomisë, Tregtisë dhe Energjetikës ose cilado ministri pasardhës, përgjegjëse për energjinë.
- **“Operatorët e sistemit të rrjetit”**, operatorët e sistemeve të rrjetit të të gjitha niveleve të tensionit, të rrjeteve transmetuese dhe shpërndarëse të energjisë elektrike.
- **“Operatori i Sistemit të Shpërndarjes”**, një person juridik, përgjegjës për operimin, sigurimin e mirëmbajtjes dhe, nëse është e nevojshme, zhvillimin e sistemit të shpërndarjes së energjisë elektrike në një zonë të caktuar dhe, kur është rasti, personi përgjegjës për realizimin e lidhjeve të tij me sistemet e tjera, si dhe sigurimin e aftësisë afatgjatë të sistemit, për të përmbushur kërkesat e arsyeshme për shpërndarjen e energjisë elektrike.
- **“Operatori i Sistemit të Transmetimit”**, një person juridik përgjegjës për operimin, dispeçimin, sigurimin e mirëmbajtjes dhe, nëse është e nevojshme, zhvillimin e sistemit të transmetimit në një zonë të caktuar, përfshirë interkoneksionin e tij me sistemet e tjere, si dhe për sigurimin e aftësisë afatgjatë të sistemit për të përmbushur kërkesat e arsyeshme për transmetimin e energjisë elektrike.

- **“Prodhues”**, çdo person, fizik apo juridik, pavarësisht nga pronësia, i cili përdor një central për të prodhuar energji elektrike ose termike nga burime energjie të rinovueshme.
- **“Prodhues që ka përparësi”**, quhet çdo prodhues i energjisë elektrike nga burime të rinovueshme, me fuqi të instaluar deri në 15 MW për të gjitha centralet e ndërtuara prej shoqërisë, i cili përfiton nga (i) mekanizmi i tarifës fikse të shitjes (feed-in tariff) dhe (ii) që kanë nënshkruar Marrëveshjen për blerjen e Energjisë (PPA) me kompaninë që ka detyrimin të blejë energjinë elektrike të prodhuar nga burimet e rinovueshme.
- **“Prodhues që nuk ka përparësi”**, çdo prodhues, i cili nuk përfiton nga mekanizmi i tarifës së futjes së energjisë elektrike në rrjet.
- **“Sistemi i rrjetit”**, të gjitha pajisjet teknike të përdorura për transmetimin dhe shpërndarjen e energjisë elektrike.
- **“Sistem diellor për prodhimin e ujit të ngrohtë”**, një pajisje ose impiant, që përdoret për të transformuar energjinë diellore në energji termike për ngrohjen e ujit.
- **“Skemë mbështetëse”**, çdo instrument, skemë ose mekanizëm i zbatuar nga qeveria shqiptare për nxitjen e shfrytëzimit të burimeve të rinovueshme, detyruese për plotësimin e objektivave të burimeve të rinovueshme të Shqipërisë, të siguruar sipas nenit 7, të këtij ligji, duke përfshirë, por duke mos u kufizuar vetëm në: tarifën e futjes së energjisë elektrike në rrjet, përjashtimin ose reduktimin e taksave, rimbursimin e taksave, ndihmë me investim (grant), karakteristikat e burimeve të ndryshme të rinovueshme, karakteristikat e impianteve që përdorin burime të ndryshme të rinovueshme, pozicionin gjeografik, madhësinë e impiantit në kuptimin e fuqisë së instaluar dhe çdo skemë tjetër mbështetëse.
- **“Tarifa e energjisë elektrike në rrjet”**, çmimi i blerjes së energjisë elektrike, i miratuar nga ERE-ja, në përputhje me nenin 17, të këtij ligji, që do të paguhet për energjinë elektrike të prodhuar nga centrale që përdorin burime energjie të rinovueshme dhe që do të paguhet nga konsumatorët fundorë, në përputhje me Modelin Shqiptar të Tregut të Energjisë Elektrike.
- **“Vlerësim i cilësisë së shërbimit në rrjet”**, një mekanizëm nxitës i përfshirë në kontratën e lidhjes në rrjet dhe në marrëveshjen për blerjen e energjisë elektrike, që bazohet në rregulloren e miratuar “Për vlerësimin e cilësisë së shërbimit në rrjet”, sipas pikës 3, të nenit 12, të këtij ligji.

**KAPITULLI II**  
**OBJEKTIVAT KOMBËTARË DHE MASAT PËR**  
**SHFRYTËZIMIN E ENERGISË NGA**  
**BURIMET E RINOVUESHME TË ENERGISË**

**Neni 4**

**Objektivat kombëtarë për përdorimin e energjisë nga  
burime të rinovueshme energjie**

Këshilli i Ministrave përcakton objektiva të veçantë të detyrueshëm kombëtarë, për pjesën e energjisë së përdorur nga burime të rinovueshme të energjisë në konsumin përfundimtar bruto të energjisë, të llogaritur në përputhje me nenin 6, të këtij ligji

**Neni 5**

**Plani Kombëtar i Veprimit për Burime të  
Rinovueshme të Energjisë**

1. Ministria përgjegjëse për energjinë, në vijim të propozimit të agjencisë përgjegjëse për burimet e rinovueshme të energjisë, do të hartojë një plan veprimi për burimet e rinovueshme të energjisë.
2. Plani Kombëtar i Veprimit për Burimet e Rinovueshme të Energjisë do të përcaktojë objektivat kombëtarë për pjesën e energjisë nga burimet e rinovueshme, që do të përdoret për prodhimin e energjisë elektrike, në transport dhe për prodhimin e energjisë termike për ngrohje e ftohje në vitin 2020 dhe masat e përshtatshme, që do të merren për të arritur objektivin e përgjithshëm të detyrueshëm kombëtar, të vendosur në nenin 4, të këtij ligji. Këtu përfshihet dhe bashkëpunimi me institucionet kombëtare rajonale dhe lokale, si edhe institucione e autoritete të vendeve fqinje, shtete që janë palë Kontraktuese të Traktatit të Komunitetit të Energjisë dhe shtete anëtare të Bashkimit Europian, vecanërisht lidhur me mekanizmat fleksibël të bashkëpunimit, të përmendur në pikën 2, shkronja “b”, të nenit 7, të këtij ligji.
3. Plani Kombëtar i Veprimit për Burimet e Rinovueshme të Energjisë do të miratohet nga Këshilli i Ministrave dhe do të monitorohet nga agjencia përgjegjëse për burimet e rinovueshme të energjisë.

4. Brenda datës 30 shtator të çdo viti, duke filluar nga viti 2012, Ministria përgjegjëse për energjinë do t'u paraqesë Këshillit të Ministrave dhe Komisionit për Veprimtaritë Prodhuese dhe Mjedisin të Kuvendit të Shqipërisë, një raport të hollësishëm për zbatimin e Planit Kombëtar të Veprimit për Burimet e Rinovueshme të Energjisë dhe plotësimin e objektivave përkatës të përcaktuar sipas nenit 2, të këtij ligji.

### **Neni 6**

#### **Llogaritja e pjesës së energjisë nga burimet e rinovueshme**

1. Pjesa e energjisë, e prodhuar nga burimet e rinovueshme, do të llogaritet duke pjesëtuar vlerën e konsumit përfundimtar bruto të burimeve të rinovueshme të energjisë me konsumin përfundimtar bruto të energjisë nga të gjitha burimet. Rezultati jepet në përqindje.
2. Vlera e konsumit përfundimtar bruto e energjisë nga burime të rinovueshme do të jetë shuma e:
  - a) konsumit përfundimtar të energjisë elektrike të prodhuar nga centrale elektrike, që prodhojnë energji duke përdorur burime të rinovueshme energjie;
  - b) konsumit përfundimtar të energjisë së prodhuar nga centrale, që përdorin burime të rinovueshme energjie për të prodhuar energji termike për ngrohje dhe ftohje;
  - c) konsumit përfundimtar të energjisë nga burime të rinovueshme, të përdorura në sektorin e transportit.
3. Biogazi dhe energjia elektrike e prodhuar nga burimet e rinovueshme të energjisë duhet të konsiderohen vetëm ato pjesë të shprehura në pikën 2, llogaritur për pjesën e konsumit final të burimeve të rinovueshme të energjisë.
4. Për qëllimin e shkronjës “a”, të pikës 2, të këtij neni:
  - a) Konsumi përfundimtar bruto i energjisë elektrike të prodhuar nga burimet e energjisë së rinovueshme do të llogaritet si sasia e energjisë elektrike të prodhuar nga centralet elektrike të vendit, që përdorin burime të rinovueshme energjie, duke përjashtuar atë pjesë të prodhimit të energjisë elektrike nga HEC-et me pompim, që ka ardhur nga energjia që është harxhuar për pompimin e ujit nga baseni i poshtëm në basenin e sipërm të çentralit.



b) Në rastin e centraleve me shumë burime energjetike, do të merret në konsideratë vetëm ajo pjesë që bazohet në shfrytëzimin e burimeve të rinovueshme të energjisë për prodhimin e energjisë elektrike.

c) Në rastin e centraleve me shumë burime energjetike, që përdorin burime konvencionale dhe të rinovueshme, do të llogaritet vetëm pjesa e energjisë elektrike të prodhuar nga burimet e energjisë së rinovueshme. Për qëllimet e kësaj llogaritjeje, kontributi i secilit burim energjie do të llogaritet në bazë të përmbajtjes së tij të energjisë, përkundrajt sasisë gjithsej të të gjitha burimeve energjetike që shfrytëzohen.

5. Energjia elektrike e prodhuar nga hidrocentralet dhe centralet e erës do të llogaritet në përputhje me rregullat e prodhimit të tyre dhe këto rregulla duhet të miratohen nga ministria përgjegjëse për energjinë.

6. Për qëllimet e shkronjës “b”, të pikës 2, të këtij neni:

a) Konsumi përfundimtar bruto i energjisë së prodhuar nga centralet e përqendruara, që përdorin burime të rinovueshme për energji termike për ngrohje dhe ftohje, do të llogaritet si sasia e energjisë termike për ngrohje dhe ftohje, e prodhuar nga burime të rinovueshme, duke shtuar konsumin e energjisë tjetër, të prodhuar nga burime të rinovueshme në sektorët e industrisë, familjar, shërbimeve, bujqësisë, pyjeve dhe peshkimit për qëllime ngrohjeje, ftohjeje dhe proceseve të përpunimit termik.

b) Në rastin e centraleve me shumë burime energjetike, që përdorin burime energjetike konvencionale dhe të rinovueshme, do të llogaritet vetëm pjesa e energjisë termike e ngrohjes dhe ftohjes, e prodhuar nga burime të rinovueshme energjie. Për qëllimet e kësaj llogaritjeje, kontributi i secilit burim energjie do të llogaritet në bazë të përmbajtjes së tij të energjisë përkundrajt sasisë gjithsej të të gjitha burimeve energjetike që shfrytëzohen.

c) Do të merret në konsideratë energjia e mjedisit të jashtëm, energjia gjeotermike dhe energjia hidrotermike e përfutur nga pompat e nxehtësisë, me kusht që prodhimi përfundimtar i energjisë të tejkalojë shumë energjinë primare të shpenzuar për të vënë në punë pompat e nxehtësisë. Sasia e energjisë termike, e konsideruar si energji nga burimet e rinovueshme për qëllimet e këtij ligji, duhet të llogaritet në përputhje me metodologjinë e llogaritjeve termike të pompave të nxehtësisë, që duhet të miratohet nga ministria përgjegjëse për energjinë.

ç) Nuk do të merret në konsideratë energjia termike e prodhuar nga sisteme diellore të shfrytëzimit të energjisë në formë pasive, në të cilat

konsumi i ulët i energjisë në ndërtesë arrihet në mënyrë pasive, bazuar në projektimin e ndërtesës ose nga nxehtësia e prodhuar nga energji prej burimeve të rinovueshme.

7. Për qëllimet e pikës 2, shkronja “c”, të këtij neni, konsumi përfundimtar i energjisë nga burimet e rinovueshme, të përdorura në sektorin e transportit, do të llogaritet në përputhje me dispozitat dhe kërkesat e ligjit “Për prodhimin, transportin dhe tregtimin e biokarburantëve”.

8. Brenda datës 1 qershor të çdo viti, agjencia e autorizuar dhe përgjegjëse për burimet e rinovueshme të energjisë duhet të dorëzojë në ministrinë përgjegjëse për energjinë dhe në ERE një vlerësim për pjesën e energjisë së prodhuar nga burimet e rinovueshme të energjisë, përfshirë në konsumin bruto të bilancit energjetik të vitit paraardhës.

## **Neni 7**

### **Masat për shfrytëzimin e energjisë së prodhuar nga burimet e rinovueshme**

1. Këshilli i Ministrave autorizohet të miratojë masa efektive për të siguruar që pjesa e energjisë nga burimet e rinovueshme të arrijë ose të tejkalojë objektivin e përcaktuar në Planin Kombëtar të Veprimit për Burimet e Rinovueshme të Energjisë. Masat e ndërmarra duhet të jenë në përputhje me legjislacionin përkatës të ndihmës shtetërore.
2. Në mënyrë që të arrihen objektivat e përcaktuar në përputhje me nenet 4 e 5, të këtij ligji, përveç mbështetjes që jep ky ligj, Këshilli i Ministrave mund të zbatojë këto masa:
  - a) Skema të tjera mbështetëse krahas atyre që jep ky ligj dhe neni 2, i ligjit “Për krijimin e kapaciteteve të reja gjeneruese të energjisë”;
  - b) Masa bashkëpunimi me cilindo shtet anëtar të Bashkimit Europian për të arritur objektivat e tyre kombëtarë në përputhje me nenet 6 dhe 7, të Direktivës 2009/28/EC, të Parlamentit Europian dhe të Këshillit Europian, të datës 23 prill 2009, për nxitjen e shfrytëzimit të energjisë nga burime të rinovueshme. Bashkëpunimi me cilindo shtet anëtar të Bashkimit Europian nuk duhet të ndikojë negativisht në arritjen e objektivave të vendosur për Shqipërinë në Planin Kombëtar të Veprimit për Burimet e Rinovueshme të Energjisë .
  - c) Çdo skemë tjetër mbështetëse që parashikohet në Planin Kombëtar të Veprimit për Burime të Rinovueshme Energjie.
3. Prodhuësit, që përdorin burime energjie të rinovueshme, që përfitojnë nga skemat mbështetëse sipas neneve 16 dhe 17, të këtij ligji, nuk do të

përfitojnë prej asnjë skeme tjetër mbështetëse, që i referohet shkronjës “a”, të pikës 2, të këtij neni.

## **Neni 8**

### **Informacioni dhe trajnimi**

1. Ministria përgjegjëse për energjinë, nëpërmjet agjencisë së autorizuar përgjegjëse për burimet e rinovueshme të energjisë, e varur prej saj, do të sigurojë që të gjithë të interesuarve, të tillë si zhvillues, planifikues, sponsorizues, investitorë, institucione financiare, ndërtues, instalues, arkitektë, furnitorë të pajisjeve dhe sistemeve të ngrohjes dhe ftohjes, t'u vihet në dispozicion informacioni për masat mbështetëse për centralet që përdorin burime të rinovueshme energjie.
2. Ministria përgjegjëse për energjinë ose agjencia përgjegjëse për burimet e rinovueshme të energjisë, në varësi të saj, që ajo autorizon, do të zhvillojë programe të përshtatshme për trajnime ose udhëzime, sensibilizimi e informimi, në mënyrë që të informohen të interesuarit dhe shtetasit për përfitimet, kostot dhe praktikitetin e zhvillimit dhe përdorimit të energjisë nga burime të rinovueshme.
3. Të gjitha subjektet, që shfrytëzojnë energjinë e burimeve të rinovueshme, janë të detyruara të paraqesin pranë Agjencisë Kombëtare të Burimeve të Rinovueshme bilancin vjetor të prodhimit të energjise, i cili do të shërbejë si bazë për monitorimin e ecurisë së targetave të prodhimit të energjise nga këto burime.

## **Neni 9**

### **Detyrat dhe përgjegjësitë e agjencisë së autorizuar, që do të jetë përgjegjëse për burimet e rinovueshme të energjisë**

1. Agjencia e autorizuar për të qenë përgjegjëse për burimet e rinovueshme të energjisë është Agjencia Kombëtare e Burimeve Natyrore, e cila, përveç detyrave dhe përgjegjësive të tjera që janë bazuar në ligje të tjera, duhet të ketë, gjithashtu, edhe këto detyra kryesore, në përmbushje të këtij ligji:
  - a) Regjistrimin e bilancit të të gjitha subjekteve që operojnë në shfrytëzimin e energjive të rinovueshme;
  - b) Hartimin dhe dorëzimin në ministrinë përgjegjëse për energjinë të projektit të Planit Kombëtar të Veprimit për Burimet e Rinovueshme të Energjisë në afatet e përcaktuara nga kjo ministri;

- c) Monitorimin e zbatimit të Planit Kombëtar të Veprimit për Burimet e Rinovueshme të Energjisë, miratuar nga Këshilli i Ministrave;
  - ç) Zhvillimin dhe dorëzimin në ministrinë përgjegjëse për energjinë të rregullores që përcakton rregullat e prodhimit të energjisë elektrike nga HEC-et dhe nga centralet e erës, sipas pikës 5, të nenit 6, të këtij ligji;
  - d) Zhvillimin dhe dorëzimin në ministrinë përgjegjëse për energjinë të metodologjisë për llogaritjen e energjisë së prodhuar nga pompat e nxehtësisë, sipas shkrtonjës “d”, të pikës 6, të nenit 6, të këtij ligji;
  - dh) Dorëzimin në ministrinë përgjegjëse për energjinë dhe në ERE brenda datës 1 qershorit të çdo viti, të vlerësimit të pjesës së energjisë së prodhuar nga burimet e energjisë së rinovueshme, përkundrejt totalit të konsumit bruto të energjisë të vitit paraardhës, sipas pikës 8, të nenit 6, të këtij ligji;
  - e) Zhvillimin e të gjithë dokumentacionit të kërkuar dhe dorëzimin e tij për miratim në ministrinë përgjegjëse për energjinë, sipas nenit 8, të këtij ligji;
  - ë) Zhvillimin dhe dorëzimin në ministrinë përgjegjëse për energjinë të rregullave specifike për llogaritjen e sasisë së nxehtësisë të prodhuar nga impiantet koogjeneruese, në mbështetje të pikës 2, të nenit 19, të këtij ligji;
  - f) Hartimin e udhëzuesve të procesit të autorizimit, dhënies së lejeve, certifikimit dhe licencimit për projektet e centraleve të reja prodhuese, me qëllimin nxitjen e përdorimit të burimeve të rinovueshme të energjisë;
  - g) Monitorimin e fondit të burimeve të rinovueshme;
  - gj) Monitorimin e subjekteve që kryejnë testimin e paneleve diellore.
2. Këshilli i Ministrave, për arritjen e objektivave të këtij ligji, brenda 6 (gjashtë) muajve nga hyrja në fuqi e këtij ligji, të ngarkojë Agjencinë Kombëtare të Burimeve Natyrore, si përgjegjëse për burimet e rinovueshme të energjisë, me detyra të tjera, përveç atyre të përmendura në pikën 1, të këtij neni, si dhe të përcaktojë afatet për realizimin e detyrave.

### **KAPITULLI III**

## **NXITJA E PRODHIMIT TË ENERGJISË ELEKTRIKE NGA BURIMET E ENERGJIVE TË RINOVUESHME**

### **Neni 10**

#### **Mbështetja për koordinimin e kërkesave të licencimit dhe lejeve**

1. Këshilli i Ministrave, brenda 6 (gjashtë) muajve nga hyrja në fuqi e këtij ligji, do të miratojë procedurat e thjeshtëzuara të marrjes së licencave dhe autorizimeve të nevojshme për prodhuesit e energjisë.
2. ERE, brenda 6 (gjashtë) muajve nga hyrja në fuqi e këtij ligji, do të miratojë procedurat dhe dokumentacionin e nevojshëm për lidhjen e objekteve gjeneruese në rrjet, sipas kritereve të vendosura në ligjin “Për sektorin e energjisë elektrike”.

## **Neni 11**

### **Lidhja dhe operimi në rrjet**

1. Me kërkesën e një prodhuesi, operatorët e sistemit të rrjetit do të lidhin centralin që plotëson kushtet teknike, në qoftë se këta operatorë nuk kanë zgjidhje tjetër me efikasitet më të lartë ekonomik për pikën përkatëse të lidhjes. Në zgjedhjen e kësaj pike më të mirë dhe më të përshtatëshme, operatori i sistemit të rrjetit duhet të marrë në konsideratë kufizimet teknike të rrjetit dhe efikasitetin ekonomik të pikës ku do të realizohet lidhja.
2. Operatorët e sistemit të rrjetit, me kërkesën e prodhuesit që ka përparësi, bëjnë lidhjen e centralit me pikën e tij në sistem, në variantin më të mirë të mundshëm lidhur me largësinë dhe kërkesat teknike të centralit, në qoftë se sistemi i rrjetit nuk ka një pikë tjetër lidhjeje më të favorshme. Në zgjedhjen e kësaj pike më të mirë dhe më të përshtatëshme operatori i sistemit të rrjetit duhet të marrë në konsideratë kufizimet teknike apo dhe efikasitetin ekonomik të pikës ku do të realizohet lidhja.
3. Me kërkesën e prodhuesit, i cili kërkon lidhjen në rrjet, dhe pas dorëzimit prej tij të projektit të burimit gjenerues dhe të projekt propozimit të lidhjes së burimit me rrjetin e transmetimit, si dhe të preventivit të realizimit të kësaj lidhjeje, operatorët e sistemit të rrjetit i sigurojnë atij informacionin e nevojshëm që përfshin:
  - a) kostot shoqërore për lidhjen në rrjet, përfshirë këtu edhe çdo kosto tjetër, që kërkohet për përmirësimin e rrjetit, të cilat duhet të mbulohen nga prodhuesi i cili ka kërkuar këtë pikë lidhjeje;
  - b) afatin kohor të saktë për marrjen dhe përpunimin e kërkesës së lidhjes në rrjet;
  - c) periudhën kohore të përafërt të propozuar të lidhjes në rrjet.

4. Informacioni për shkronjat“a”, “b” dhe “c”, të pikës 3, duhet të sigurohet nga operatori i sistemit në përputhje me afatet dhe parashikimet e kodit të transmetimit dhe kodit të shpërndarjes.

5. ERE-ja, pas konsultimit me operatorët e sistemit të rrjetit, miraton brenda 6 (gjashtë) muajve nga hyrja në fuqi e këtij ligji, rregulloren që ka të bëjë me të drejtën në sistemin e rrjetit për prodhuesit me dhe pa përparësi, të cilët duhet të përmbushin jo vetëm (i) kërkesat teknike për lidhjen në rrjet; (ii) kushtet apo kufizimet për fuqinë e instaluar të centraleve, që do të lidhen në sistemin e rrjetit, si dhe (iii) kufizimet lidhur me zona të veçanta gjeografike brenda Shqipërisë, bazuar në ndikimin që këta prodhues mund të kenë në sistemin energjetik. Kjo për të siguruar që rrjeti të mos ndikohet negativisht nga ndërprerjet e prodhimit të energjisë elektrike brenda një rajoni dhe për të parandaluar zhvillimin e instalimeve me kapacitete të mëdha të energjive të rinovueshme të përqëndruara në rajone të veçanta të Shqipërisë, si parqetem mëdha me erë. Këto rregullore janë subjekt i rivlerësimit në çdo vit dhe miratohen e publikohen në fund të çdo viti.

6. Lidhja në rrjet dhe ndërtimi i pajisjeve të tjera ndihmëse të nevojshme për sigurinë e sistemit elektroenergjetik duhet të plotësojnë kërkesat teknike të operatoreve të sistemit në këtë rast, si edhe ato të përcaktuara në seksionet përkatëse të kodit të transmetimit ose të kodit të shpërndarjes, në varësi të pikës së lidhjes.

7. Transmetimi dhe shpërndarja e energjisë elektrike, e prodhuar nga burimet e rinovueshme nga prodhuesi me përparësi, është i garantuar. Operatori i Sistemit të Transmetimit, gjatë dispeçerimit, duhet t'i japë përparësi centralit, i cili prodhon energji nga burime të rinovueshme, për aq kohësa e lejon siguria e sistemit kombëtar të energjisë elektrike dhe bazuar në kriteret e transparencës dhe të mosdiskriminimit.

8. Operatorët e sistemit të rrjetit duhet të optimizojnë, të zgjerojnë dhe të përmirësojnë sistemin për lidhjen dhe transmetimin e energjisë elektrike nga centralet e reja, që përdorin burime të rinovueshme energjie, në përputhje me Planin Kombëtar të Veprimit për Burimet e Rinovueshme të Energjisë, masterplanet e operatoreve të sistemit për zgjerimin e sistemit të rrjetit apo çdo dokument zyrtar në fuqi. Këto plane për optimizimin, zgjerimin dhe rikonstruksionin e sistemit të rrjetit, kur është e përshtatshme, duhet të përfshijnë edhe kapacitetet e interkonjeksionit, rrjeteve inteligjente dhe kapacitetet akumuluese, me qëllim që të sigurojnë operimin e operatorit të rrjetit, si dhe përshtatjen e zhvillimeve të mëtejshme për prodhimin e energjisë elektrike nga burimet e rinovueshme të energjisë.

9. Operatorët e sistemit të rrjetit duhet të përpilojnë dhe të bëjnë publike rregulloret standarde për llogaritjet dhe ndarjen e kostove, lidhur me lidhjet e reja në rrjet, përmirësimin dhe rinovimin e rrjetit, përmirësimin e operimit të rrjetit dhe rregullat për implementimin pa diskriminim të kodeve të rrjetit, të nevojshme për integrimin e prodhuesve të rinj në rrjet. Këto rregullore duhet të bazohen në kriterin e mosdiskriminimit, objektivitetit dhe transparencës, duke marrë parasysh të gjitha kostot dhe përfitimet e lidhjes së prodhuesve në rrjet dhe rrethana të veçanta të prodhuesve në zona periferike dhe ato me dendësi të ulët popullore.

10. Kostot për realizimin e lidhjes së centralit, që përdor burime të rinovueshme energjie, në pikën më të përshtatshme teknike dhe ekonomike të rrjetit elektrik do të paguhet nga prodhuesi, përveç rasteve kur kostoja e lidhjes së tyre do të përballohet nga operatori i rrjetit apo nëpërmjet një investimi privat, sipas dispozitave të ligjit “Për sektorin e energjisë elektrike”.

11. Kostot e shoqëruara me zgjerimin dhe rikonstruksionin e sistemit ekzistues të tensionit të ulët dhe të mesëm, si dhe të nënstacioneve për pjesët që do të shfrytëzohen nga prodhuesi do të përcaktohen mbështetur në pikat 8 dhe 9, të këtij neni.

12. Kufijtë e pronësisë ndërmjet operatorëve të sistemit dhe centralit duhet të përcaktohen në marrëveshjen e lidhjes në rrjet. Në rast mosmarrëveshjeje kufijtë e pronësisë dhe detyrimet e ndërsjella për mirëmbajtjen e rrjetit përcaktohen nga ERE-ja.

## **Neni 12**

### **Rregullat që zbatohen për lidhjen në rrjet**

1. ERE-ja, brenda 6 (gjashtë) muajve nga data e hyrjes në fuqi të këtij ligji, pas marrjes së mendimit nga operatorët e sistemit të rrjetit, do të miratojë rregullore specifike dhe një model për marrëveshjen “tip” për lidhjen në rrjet, në të cilat do të përcaktohen kushtet ekonomike dhe teknike për ofrimin e shërbimeve për lidhjen në sistemin e rrjetit të centraleve, që prodhojnë energji elektrike nga burime të rinovueshme energjisë, me shfrytëzimin e rrjetit etj.
2. Rregulloret e përmendura në pikën 1, të këtij neni:
  - a) do të sigurojnë standardet teknike të ndërtimit të centralit dhe të pajisjeve të lidhjes deri tek rrjeti i operatorëve të rrjetit;

- b) do të vendosin rregullat në përputhje me të cilat punimet për lidhjen në rrjet do të mund të realizohen tërësisht ose pjesërisht nga prodhuesi, duke parashikuar edhe kushtet kur lidhja bëhet nga operatori i rrjetit apo nga një investim privat, duke përcaktuar dhe kërkesat teknike për pajisjet, që duhet të instalohen në pikën e lidhjes nga ana e prodhuesit;
  - c) do të parashikojnë publikimin e kushteve ekonomike dhe teknike të nevojshme për kryerjen e çdo punimi, që ka të bëjë me infrastrukturën e rrjetit, të përshtatshëm për lidhjen e centraleve të reja me operatorët e sistemit të rrjetit.
3. ERE-ja, brenda 12 (dymbëdhjetë) muajve nga data e hyrjes në fuqi të këtij ligji, pas konsultimit me operatorët e sistemit të rrjetit, duhet të miratojë rregulloren “Për vlerësimin e standardeve të cilësisë së shërbimit në rrjet”, që do të përcaktojë vlerat standarde të ndërprerjeve vjetore për çdo nivel tensioni dhe për çdo tip të rrjetit. Këto vlera duhet të përfshijnë ndërprerjet totale gjatë një viti (të parashikuara apo të paparashikuara), të shkaktuara nga operatorët e sistemit të rrjetit, duke përcaktuar kështu edhe cilësinë e shërbimit në rrjet. Vlerat standarde të ndërprerjeve vjetore do të përdoren nga prodhuesit me përparësi dhe operatorët e sistemit të rrjetit për të rënë dakord lidhur me alokimin mujor të tyre, në rast se ekziston vlerësimi i cilësisë së shërbimit në rrjet, përcaktuar në marrëveshjen e lidhjes nërrjet dhe kontratën e shitblerjes së energjisë. Në këto dokumente përcaktohen dhe detyrimet e operatorëve të rrjetit, në rast se nuk plotësojnë detyrimin për transmetimin e energjisë elektrike të planifikuar.
4. Me kërkesë të prodhuesit me përparësi, operatorët e sistemit të rrjetit janë të detyruar të hyjnë në marrëveshjen e lidhjes në rrjet, që përfshin vlerësimin e cilësisë së shërbimit në rrjet.
5. Marrëveshja standarde e lidhjes në rrjet duhet të përmbajë detyrimin e operatorit të sistemit të rrjetit për të transmetuar energjinë elektrike të prodhuar nga centrali.
6. Marrëveshja standarde e lidhjes në rrjet, ndër të tjera, duhet të specifikojë që operatori i sistemit të rrjetit lejohet të ndërpresë lidhjen:
- a) për një periudhe të arsyeshme kohe, për punime mirëmbajtjeje të nevojshme ose për ndërhyrje të tjera teknike. Të tilla ndërprerje do të përcaktohen në standartin e vlerësimin të cilësisë së shërbimit në rrjet;
  - b) në përputhje me kontratën e lidhjes në rrjet, në rastet e mosplotësimit të kushteve teknike të kërkuara sipas kodeve të transmetimit dhe të shpërndrjes;



- c) në rastin e forcave madhore;
- ç) në rast të rrezikimit të jetës së njerëzve apo të dëmtimit të pronës apo pasurisë.

7. Operatorët e sistemit të rrjetit do të jenë të detyruar t'i ofrojnë prodhuesit, i cili kërkon lidhje në rrjet për një central, një zgjidhje të përshtatshme, brenda një afati kohor të arsyeshëm të përcaktuar nga rregullat e referuara pikën 2, të këtij neni, për lidhjen në rrjet.

8. Operatorët e sistemit të rrjetit do t'i vënë në dispozicion një prodhuesi, i cili dëshiron të lidhet në sistem, informacionin e nevojshëm dhe të gjerë, me shkrim, veçanërisht lidhur me kapacitetet e sistemit të rrjetit, përfshirë kërkesat dhe kushtet teknike dhe ekzistencën e pikave të lidhjes në rrjet, në një zonë të dhënë gjeografike.

### **Neni 13**

#### **Zgjidhja e mosmarrëveshjeve për lidhjen në rrjet**

1. Secila nga palët, për çdo mosmarrëveshje ndërmjet një operatori të sistemit të rrjetit dhe një prodhuesi, që kërkon një lidhje në rrjet, që lind në bazë të dispozitave të nenit 11, të këtij ligji, mund t'i drejtohet ERE-së për zgjidhjen e mosmarrëveshjes.

2. Mosmarrëveshja do të zgjidhet me vendim të ERE-së. Praktika dhe procedura që do të ndiqet në lidhje me këtë vendim do të jenë sipas rregullave dhe praktikave procedurale të ERE-së.

3. Mosmarrëveshja, që lind në bazë të këtij neni, dhe që ka të bëjë me kryerjen e një lidhjeje të një centrali në një sistemi rrjeti, duhet t'i paraqitet ERE-së brenda 12 muajve nga data kur është bërë lidhja. Mosmarrëveshjet, që paraqiten pas këtij afati, nuk merren në shqyrtim nga ERE-ja.

4. ERE-ja mund të japë udhëzime përsa u përket rrethanave dhe termave, në bazë të të cilave operatori i sistemit të rrjetit do të kryejë, ose, sipas rastit, do të mbajë një lidhje në pritje të zgjidhjes së një mosmarrëveshjeje. Vendimi i ERE-së duhet të jetë në përputhje me dispozitat e Kodit të Procedurave Administrative. Në rast se ndonjëra nga palët nuk është dakord me vendimin e ERE-së, ajo mund t'i drejtohet gjykatës, që merret me trajtimin e këtyre mosmarrëveshjeve.

5. Në vendimin e ERE-së përcaktohet dhe mënyra e pagesës së shpenzimeve që kryhen nga ERE-ja për këtë procedurë.

**Neni 14**  
**Detyrimi për të blerë energji elektrike të prodhuar nga burime të rinovueshme energjie**

1. Blerësi i energjisë elektrike të prodhuar nga prodhuesi që ka përparësi, nëse kërkohet nga ky i fundit, është Furnizuesi Publik me Shumicë.
2. ERE, brenda 6 (gjashtë) muajve nga data e hyrjes në fuqi të këtij ligji, duhet të miratojë rregullat specifike dhe një model për një marrëveshje “tip” për blerjen e energjisë elektrike, që lidhet ndërmjet blerësit të energjisë së prodhuar me burime të rinovueshme të energjisë dhe prodhuesit që ka përparësi, me një afat maksimal deri në 15 (pesëmbëdhjetë) vjet.
3. Me kërkesën e prodhuesit që ka përparësi, blerësi i energjisë elektrike nga burimet e rinovueshme të energjisë është i detyruar të nënshkruajë marrëveshjen për blerjen e energjisë elektrike që të blejë energjinë e prodhuar nga centralet që shfrytëzojnë vetëm burime energjie të rinovueshme, në bazë të energjisë së faturuar.
4. Në rastin e centraleve koogjeneruese, detyrimi për blerjen e energjisë elektrike, sipas pikës 2, të këtij neni, duhet të kufizohet në blerjen e energjisë së faturuar të prodhuar vetëm nga pjesa e shfrytëzimit të burimeve të rinovueshme të energjisë.
5. Për centralet me disa burime energjetike, detyrimi për të blerë energji elektrike siç parashikohet në pikën 2, të këtij neni, do të kufizohet në blerjen e energjisë elektrike, që vërtetohet se është prodhuar nga burime të rinovueshme energjie.
6. Marrëveshja “tip” e blerjes së energjisë elektrike do të përmbajë të paktën:
  - a) termat e detyrueshëm për blerësin e energjisë së prodhuar nga burime të rinovueshme të energjisë për të blerë dhe paguar energjinë elektrike të faturuar;
  - b) aplikimin e tarifës fikse për kWh, sikurse përcaktohet nga ERE;
  - c) lidhjen dhe operimin e centralit apo impiantit dhe përshkrimin e parametrave përkatës;
  - ç) vlerësimin e cilësisë së shërbimit në rrjet, në qoftë se është përfshirë në kontratën e shitblerjes së energjisë elektrike, përfshirë edhe formulën e përcaktimit të energjisë elektrike të faturuar;
  - d) përcaktimin e orë-ndërprerjeve mujore dhe orë-ndërprerjeve vjetore standard dhe pagesën e faturës përkatëse;

- dh) rregullat e matjes, pronësisë, provat dhe specifikimet teknike të sitemit të matjes që duhet të përdoret;
- e) mënyrën e faturimit dhe termat e pagesave;
- ë) detyrimet kryesore të blerësit të energjisë së rinovueshme dhe prodhuesve që kanë përparësi;
- f) dispozitat në lidhje me dëmshpërblimin dhe përgjegjësitë;
- g) përcaktimin e forcës madhore;
- gj) dispozitat përkatëse për zgjidhjen e mosmarrëveshjeve;
- h) hyrjen në fuqi, zgjatjen dhe dispozitat e mbylljes së kontratës.

7. Blerësi i burimeve të rinovueshme të energjisë duhet të jetë përgjegjës për çdo kosto që lind si rezultat i disbalancës ndërmjet prodhimit të parashikuar dhe atij që ndodh aktualisht në centralet që kanë përparësi, siç edhe detajohet më tej në ligjin e sektorit të energjisë elektrike dhe modelin e tregut të energjisë elektrike në Shqipëri.

8. Centralet që nuk kanë përparësi i mbulojnë vetë kostot për energjinë balancuese.

## **Neni 15**

### **Tarifat fikse të energjisë elektrike të prodhuar**

1. Këshilli i Ministrave, brenda 6 (gjashtë) muajve nga hyrja në fuqi e këtij ligji, me propozim të ERE-së, do të miratojë metodologjinë e përcaktimit të tarifave fikse të energjisë elektrike, që do t'i paguhet prodhuesit me përparësi, për të gjitha llojet e centraleve, që shfrytëzojnë burime të rinovueshme energjie.

2. Metodologjia:

- a) do të lejojë rikuperimin e investimeve të prodhuesit me një normë fitimi të arsyeshme;
- b) do të përcaktojë kapacitetin maksimal të instaluar për secilin lloj burimi të rinovueshëm energjie, që do të përfitojë nga tarifa fikse;
- c) do të marrë në konsideratë impaktin social dhe ekonomik, që do të rezultojë për konsumatorët fundorë nga zbatimi i skemës së tarifës fikse;
- ç) do të marrë në konsideratë indeksin e inflacionit, për të mbuluar inflacionin e kursit të këmbimit nga lek në euro për çdo vit, bazuar në kriteret e percaktura nga ana e Bankes së Shqipërisë;
- d) do të përcaktojë një formulë për llogaritjen e çdo mbingarkese nga energjitë e rinovueshme në çmimin e konsumatorit fundor, për të gjithë konsumatorët e energjisë elektrike në Shqipëri.

3. ERE-ja, në përputhje me metodologjinë e hartuar për tarifën fikse, miraton vlerat përkatëse të tarifave fikse, që duhet të paguhet për prodhuesit me përparësi, duke i ndare ata në tre grupe për hidrocentralet: grupi i parë: nga 0 kw deri në 2000 kW; grupi i dytë nga 2001 deri në 5000 kW; dhe grupi i tretë nga 5001 deri në 15000 kW.

Tarifat fikse për hidrocentralet, sipas grupeve, aplikohen me të njëjten vlerë, edhe për të gjitha llojet e tjera të burimeve të rinovueshme të energjisë.

- 4. Tarifa fikse, që do t'i paguhet prodhuesit që ka përparësi, sipas një kontrate shitblerjeje të energjisë elektrike, do të jetë një tarifë e zbatueshme në ditën e plotësimit dhe nënshkrimit të kësaj kontrate ndërmjet blerësit të energjisë nga burimet e rinovueshme të energjisë dhe prodhuesve që kanë përparësi. Tarifa e vendosur në kontratën e shitje-blerjes së energjisë do të jetë, maksimumi, deri në 15 vjet dhe do të përditësohet për çdo vit.
- 5. Formula e mëposhtme do të zbatohet nga ana e ERE-s për të bërë të mundur përcaktimin e tarifës fikse për secilën teknologji të burimeve të rinovueshme, me të gjitha kostot që varen në mënyrë specifike nga teknologjia për realizimin dhe operimin e projektit për një periudhë 15-vjecare. Kriteret e mësipërme do të merren në konsideratë në formulën e llogaritjes së tarifës fikse, që në formë të përgjithshme është si më poshtë:

$$FiT = \frac{I}{FLH} \left( \frac{WACC}{1 - \frac{1}{(1+WACC)^T}} \right) + \frac{c_F}{FLH} + c_V \quad [Lek / MWh]$$

Ku:

FiT - çmimet e energjisë elektrike të shitjes (tarifat fikse), duke përdorur burimet e energjive të rinovueshme (lekë/kWh) për secilin nga tre grupet e sipërpërmendura.

I – kostoja mesatare specifike e investimeve (lekë/MW) për secilin nga tre grupet e sipërpërmendura, që përcaktohet nga ERE-ja çdo tre vjet.

FLH – orët mesatare të punës me fuqi maksimale në vit (orë për vit) për secilin nga tre grupet e sipërpërmendura;

WACC – norma mesatare e ponderuar e kostos së kapitalit, që merr parasysh normat mesatare të huasë në tregun shqiptar, normën e interes të *equities* (kapitalit të vetë investitorëve), si dhe strukturën e kapitalit (*equity*/hua) që përcaktohet nga ERE çdo tre vjet

T – kohëzgjatja e çmimit të garantuar, në vite – (15 vite për prodhuesit me përparësi).

CF – kostot mesatare specifike të operimit dhe menaxhimit (lekë/MW/vjet për secilin nga tre grupet e sipërpërmendura, që përcaktohet nga ERE-ja çdo tre vjet..

CV – kostot mesatare të lëndës djegëse dhe kostot e tjera të ndryshueshme të menaxhimit (që përdoret si term vetëm për centrale me dy lëndë djegëse që përdorin edhe një sasi të vogël lënde djegëse për stabilitetin e flakës) (lekë/MWh), për secilin nga tre grupet e sipërpërmendura, që përcaktohet nga ERE çdo tre vjet.

6. ERE-ja, bazuar në planin e veprimit të burimeve të rinovueshme të Energjisë do të përcaktojë, çdo tre vjet, kapacitetin total maksimal/të sipërm të instaluar për çdo teknologji të burimeve të rinovueshme.
7. Prodhuesit me përparësi, të cilet kanë fituar të drejtën për ndërtimin e burimeve që shfrytëzojnë energjinë e rinovueshme, kanë të drejtë të kërkojnë aplikimin e formulës së mësipërme, për shitjen e energjisë elektrike të prodhuar nga objektet e tyre.
8. Kërkesa nga prodhuesit me përparësi, sipas pikës 7 të këtij neni, mund të bëhet vetëm një herë.

## **Neni 16**

### **Informacioni dhe vlerësimi periodik**

1. Të gjitha subjektet, që prodhojnë energji nga burimet e rinovueshme, janë të detyruara që, brenda tremujorit të parë të vitit pasardhës, të paraqesin pranë ERE-s dhe Agjencisë Kombëtare të Burimeve Natyrore, bilancin vjetor të një viti më parë.
2. ERE-ja, në raportin vjetor që dërgon në Kuvendin e Republikës së Shqipërisë, duhet të përfshijë dhe një vlerësim të pjesës së energjisë së prodhuar nga burimet e energjisë së rinovueshme, përkundrejt konsumit gjithsej të energjisë për vitin përkatës kalendarik. Gjithashtu, në këtë raport duhet të japë dhe efektet, që kanë ardhur nga nxitja e përdorimit të burimeve të rinovueshme të energjisë në tarifën e përgjithshme mesatare të konsumatorëve fundorë për vitin e mëparshëm.

### **Neni 17**

#### **Dispozita specifike për centralet me disa burime energjetike**

1. Prodhuësit, që prodhojnë energji elektrike nga centralet me disa burime energjetike, pra nga përzgjedhja e burimeve të rinovueshme dhe jo të rinovueshme, janë të detyruar të paraqesin matjet dhe llogaritjet e energjisë elektrike, të prodhuar nga burimet e rinovueshme, në përputhje me metodologjinë e përcaktuar në rregulloret e miratuara nga ERE-ja.
2. Prodhuësi, që prodhon energji elektrike dhe/ose termike nga përdorimi i kombinuar i biomasës dhe i burimeve jo të rinovueshme nga një central koogjenerues, do t'i raportojë brenda 3 - mujorit të parë të vitit pasardhës:
  - a) ERE-së, agjencisë përgjegjëse për monitorimin e përdorimit të burimeve të rinovueshme, bilancin vjetor të një viti më parë dhe blerësit të burimeve të rinovueshme të energjisë, sasinë e energjisë elektrike dhe/ose termike të prodhuar nga burimi i rinovueshëm;
  - b) agjencisë së autorizuar dhe përgjegjëse për monitorimin e prodhimit nga burimet e rinovueshme të energjisë, sasinë e nxehtësisë të prodhuar nga burimi i rinovueshëm i energjisë, si dhe sasinë dhe cilësinë e biomasës së përdorur për këtë qëllim. Për qëllime të kësaj llogaritjeje, kontributi i çdo burimi energjie do të llogaritet mbi bazën e përbërësve të saj.
3. Brenda 12 (dymbëdhjetë) muajve nga data e hyrjes në fuqi të këtij ligji, me propozim të ERE-së, pas marrjes së mendimit nga agjencia e autorizuar dhe përgjegjëse për trajtimin e burimeve të rinovueshme të energjisë, ministria përgjegjëse për energjinë do të miratojë një rregullore të posaçme. Rregullorja duhet të përcaktojë rregullat për matjen dhe llogaritjen e sasisë

së energjisë elektrike, të prodhuar nga burimet e energjisë së rinovueshme, të përdorura për prodhim energjie elektrike dhe termike në centrale me disa burime të rinovueshme energjie, në përputhje me pikën 1, të këtij neni, dhe për prodhimin e energjisë elektrike dhe/ose termike në centralet me koogjenerim për qëllimet e pikës 2, të këtij neni. Për qëllim të kësaj llogaritjeje, kontributi i çdo burimi energjie do të bëhet mbi bazën e përbërjes së energjisë së tij.

**KAPITULLI IV**  
**GARANCIA E ORIGJINËS SË ENERGJISË**  
**ELEKTRIKE**  
**TË PRODHUAR NGA BURIMET E RINOVUESHME TË**  
**ENERGJISË**

**Neni 18**

**Garancia e origjinës**

1. ERE-ja, me kërkesën e prodhuesit, i cili ka marë një leje ose autorizim për ndërtimin apo rehabilitimin e një centrali, që shfrytëzon burime të rinovueshme të energjisë, lëshon një garanci origjine për çdo njësi të energjisë elektrike ose termike të prodhuar nga centrali. Për një njësi gjeneruese të energjisë lëshohet vetëm një garanci origjine.

2. Garancitë e origjinës do të jenë për një njësi të energjisë elektrike standard prej 1MWh dhe do të specifikojnë:

- a) emrin dhe adresën e prodhuesit;
- b) burimet e energjisë nga të cilat është prodhuar energjia elektrike, të listuar sipas llojit dhe përbërësve kryesorë, përfshirë edhe informacionin se në çfarë mase energjia elektrike është prodhuar nga burimet e rinovueshme të energjisë;
- c) vendndodhjen, kapacitetin dhe datën e vënies në punë të centralit;
- ç) periudhën kohore kur është prodhuar energjia dhe deri në çfarë mase prodhuesi ka përfituar në përputhje me nenin 15 të këtij ligji si, në qoftë se dhe deri në çfarë mase ky central ka përfituar nga mbështetja e investimit, në qoftë se dhe deri në çfarë mase “njësia e energjisë” ka përfituar në ndonjë mënyrë tjetër nga skema kombëtare e mbështetjes apo çdo lloj skeme mbështëse;
- d) datën, shtetin që ka lëshuar garancinë dhe numrin unik të identifikimit.

3. ERE-ja do të mbikëqyrë lëshimin, transferimin dhe anulimin e garancive të origjinës, në përputhje me dispozitat e rregullores së nxjerrë sipas pikës 9, të këtij neni, dhe do të sigurojë që e njëjta njësi e energjisë elektrike, e prodhuar nga centrale me burime të rinovueshme energjie, është marrë në konsideratë vetëm një herë.

4. Garancitë e origjinës do të lëshohen në bazë të të dhënave të gjithanshme dhe informacionit të përshtatshëm për të vërtetuar origjinën e energjisë elektrike të furnizuar nga prodhuesi, si dhe të dhëna matjesh, të vërtetuara nga operatori i sistemit të rrjetit. Garancitë e origjinës do të lëshohen vetëm pasi prodhuesi paraqet gjithë informacionin e kërkuar në pikën 2, të këtij neni.

5. Çdo përdorim i një garancie origjine do të bëhet brenda 12 (dymbëdhjetë) muajve nga data e prodhimit të njësisë korresponduese të energjisë elektrike. Garancia e origjinës do të anulohet menjëherë pasi është përdorur.

6. Nëse energjia elektrike është prodhuar nga një hidrocentral me sistem me cikël pompimi, që bën të mundur ngritjen e ujit në basenin e sipërm, pra kur turbinat kanë punuar në regjim pompe, garancia e origjinës do të lëshohet vetëm për sasinë e energjisë elektrike që i korrespondon diferencës ndërmjet energjisë elektrike të prodhuar nga hidrocentrali dhe energjisë elektrike të konsumuar për pompimin e ujit në rezervuarin e sipërm.

7. Nëse energjia elektrike është prodhuar nga mbetjet urbane dhe industriale, garancia e origjinës do të lëshohet vetëm për sasinë e energjisë që i korrespondon pjesës së tyre të biodegradueshme, siç është përkufizuar në nenin 3, të këtij ligji.

8. Brenda një periudhe prej 12 muajve, nga data e hyrjes në fuqi të këtij ligji, ERE-ja do të përgatitë një regjistër elektronik të garancive të origjinës, me një mekanizëm të përshtatshëm për përpunimin e të dhënave, për të siguruar që këto garanci do të lëshohen, do të transferohen dhe do të anulohen në mënyrë elektronike dhe që do të jenë të sakta, të besueshme dhe rezistente ndaj falsifikimit. Palët e interesuara do të kenë të drejtën e hyrjes së lirë në këtë regjistër.

9. Brenda së njëjtës periudhë kohe, të përmendur në pikën 8, të këtij neni, ERE-ja do të miratojë një rregullore të posaçme për procedurën e aplikimit për garanci origjine. Rregullorja, përveç të tjerash, do të parashikojë në veçanti:



- a) dokumentacionin që do të paraqitet nga prodhuesi për kualifikimin teknik të çentralit të tij si central që prodhon energji elektrike ose termike nga burime të rinovueshme energjie;
- b) procedurën e kualifikimit teknik dhe veçanërisht afatin kohor brenda të cilit ERE-ja duhet t'u përgjigjet aplikimeve të paraqitura, si dhe pasojat juridike për rastet kur nuk plotësohet ky detyrim;
- c) procedurën e aplikimit për lëshimin, regjistrimin, transferimin ose anulimin e garancive të origjinës;
- ç) procedurën e monitorimit të zbatimit të këtyre detyrimeve nga subjekti;
- d) çështjet lidhur me bashkëpunimin ndërmjet autoriteteve kompetente të shteteve anëtare të Bashkimit European dhe vendeve të tjera me të cilat ka marrëveshje të nënshkruar për njohjen e ndërsjellë të garancive të origjinës.

10. ERE-ja është e autorizuar dhe përgjegjëse për të ndryshuar çdo rregullore dhe procedurë të mëparshme, që ka të bëjë me garancitë e origjinës, për të reflektuar dispozitat e parashikuara në pikën 9, të këtij neni.

### **Neni 19**

#### **Procedura e monitorimit**

1. Në mënyrë që të sigurohet se janë plotësuar kushtet e lëshimit të garancive të origjinës dhe se të dhënat e informacioni, në bazë të të cilit janë lëshuar ato është i saktë, përfaqësuesit e ERE-së dhe çdo person i autorizuar prej saj, pa paragjykuar repektimin e sekreteve të biznesit, do të ketë të drejtë hyrjeje të lirë në centralin prodhues përkatës dhe në të gjitha të dhënat e informacionin, që lidhen me atë central. Prodhuesi është i detyruar të lehtësojë punën e përfaqësuesve të ERE-së dhe të personave të autorizuar prej saj. ERE-ja mund të refuzojë njohjen e një garancie origjine vetëm kur ka dyshime të bazuara për saktësinë, besueshmërinë apo vërtetësinë e saj.

2. Energjia elektrike e prodhuar nga burimet e rinovueshme të energjisë dhe për të cilën është lëshuar një certifikatë origjine nuk mund të shitet tek konsumatorët fundorë si energji elektrike e prodhuar nga burimet e rinovueshme energjie.

### **Neni 20**

#### **Bashkëpunimi ndërkombëtar për garancitë e origjinës**

1. Një garanci origjine për energjinë elektrike të prodhuar nga burime energjie të rinovueshme, e lëshuar nga një shtet që është anëtar i Bashkimit European,

ose palë kontraktuese e Traktatit të Komunitetit të Energjisë të Europës Juglindore, do të njihet edhe në Republikën e Shqipërisë.

2. Këshilli i Ministrave mund të hyjë në marrëveshje me cilindo shtet anëtar të Bashkimit European ose shtetë palë kontraktues të Traktatit të Komunitetit të Energjisë të Europës Juglindore, për njohjen e ndërsjellë të garancive të origjinës, për qëllimet e monitorimit të përmbushjes së kërkesave të nenit 4, të këtij ligji, lidhur me objektivat e përgjithshëm kombëtarë për burimet e rinovueshme të energjinë.

3. ERE-ja bashkëpunon me të gjitha autoritetet që lëshojnë garancitë e origjinës të vendeve anëtare të Bashkimit European dhe me çdo shtet që është palë kontraktuese e Traktatit të Komunitetit të Energjisë të Europës Juglindore, me qëllim që të sigurojë konsumatorët fundorë për sasinë e energjisë së prodhuar nga burime të rinovueshme, në krahasim me të gjithë energjinë që furnizohet.

## **KAPITULLI V**

### **NXITJA E PËRDORIMIT TË SISTEMEVE TË PANELEVE DIELLORE PËR PRODHIMIN E UJIT TË NGROHTË**

#### **Neni 21**

#### **Objektivat minimalë për shfrytëzimin e energjisë diellore**

1. Në kuadër të detyrimit kombëtar për burime të rinovueshme të energjisë, të vendosura sipas nenit 4 të këtij ligji, Këshilli i Ministrave duhet të vendosë treguesit minimalë për prodhimin e ujit të ngrohtë sanitar në stokun e ndërtesave dhe për procese teknologjike, të siguruar nga sistemet e paneleve diellore.
2. Treguesi minimal i shfrytëzimit të energjisë diellore, të vendosur në pikën 1, të këtij neni, do të vendoset duke marrë në konsideratë rrezatimin diellor në zona të ndryshme të vendit.
3. Këshilli i Ministrave duhet të miratojë kritere specifike për llogaritjen e kontributit të energjisë diellore për prodhimin e ujit të ngrohtë ose veçmas ose si pjesë e kodit energjetik të ndërtesës, duke marrë në konsideratë standardet më të fundit të Bashkimit European të miratuara për këtë qëllim.

#### **Neni 22**

## **Instalimi i detyrueshëm i sistemeve të paneleve diellore për prodhimin e ujit të ngrohtë**

1. Këshilli i Ministrave duhet të përshtatë politikat dhe të ndërmarrë masa për rritjen e shfrytëzimit të energjisë diellore në stokun e ndërtesave, si për ato ekzistuese, ashtu dhe për ndërtesat e reja dhe, ndërtesa publike ose private, për të instaluar sisteme diellore të ujit të ngrohtë për të plotësuar targetat/caqet e vendosura për rritjen e kontributit të energjisë diellore në konsumin total energjetik të vendit.
2. Këshilli i Ministrave, me propozim të ministrisë përgjegjëse të energjisë, duhet të përcaktojë sektoret ekonomikë dhe kategoritë e ndërtesave, sipërfaqen minimale osë kapacitetin e sistemeve të paneleve diellore të prodhimit të ujit të ngrohtë që duhet të instalohet në to, kërkesat teknike për sistemet e paneleve diellore që do të instalohen si dhe procedurat specifike e kriteret që duhet të ndiqen në lidhje me përforcimin e zbatimit të këtyre detyrimeve dhe monitorimin e tyre nga institucionet përgjegjëse.
3. Çdo detyrim për instalimin e sistemeve të paneleve diellore në përputhje me pikat 1 dhe 2, të këtij neni, do të merret parasysh në lëshimin e certifikatës së performancës së energjisë në ndërtesa që do të lëshohet në përputhje me nenet përkatëse të ligjit të efijencës së energjisë.
4. Në vendosjen e detyrimeve të dhëna në pikat 1 dhe 2, të këtij neni, ndërtesat publike duhet të tregojnë një rol parësor, duke filluar instalimin e sistemeve të paneleve diellore nga viti 2013 dhe në vazhdim.

### **Neni 23**

#### **Certifikata dhe etiketa e sistemeve të paneleve diellore për prodhimin e ujit të ngrohtë**

1. Të gjitha sistemet e paneleve diellore të prodhimit të ujit të ngrohtë që prodhohen në vend ose që importohen dhe që janë instaluar për të plotësuar targetat sipas nenit 24 ose që mbështeten nga çdo lloj skeme nxitëse publike, duhet të plotësojnë minimumet teknike që duhet të përgatiten në mënyrë të qartë nga Këshilli i Ministrave. Në ato raste kur standardet Europiane ekzistojnë, të tilla specifikime teknike duhet të jenë në harmoni me ato standarde.
2. Testimi i sistemeve të paneleve diellore duhet të kryhet nga një person juridik i akredituar në përputhje me ligjet në fuqi dhe procedurat e testimit duhet të plotësojnë standardet europiane specifike të testimit që zbatohen për prodhime të tilla. Në të kundërt, rregullat teknike specifike të adoptuara nuk

duhet të përshkruhen në ato raste kur pajisjet dhe sistemet diellore duhet të certifikohen dhe nuk duhet të pengojnë tregun e brendshëm.

3. Këshilli i Ministrave duhet të miratojë brenda vitit 2013 skemat certifikuese ose skemat ekuivalente kualifikuese, për instaluesit e sistemeve të paneleve diellore, të hartuara nga Agjencia Kombëtare e Burimeve Natyrore. Të tilla certifikata do t'u kërkohen edhe instaluesve të sistemeve të paneleve diellore, që instalohen për plotësimin e treguesve në fuqi dhe atyre që përfitojnë nga skemat e nxitjes publike.
4. Çdo subjekt është i detyruar të regjistrojë në Agjencinë Kombëtare të Burimeve Natyrore çdo sistem të paneleve diellore të ujit të ngrohtë, të prodhuar në vend apo edhe të importuar në tregun vendor. Ato duhet të sigurojnë për konsumatorët të gjithë informacionin e kërkuar ashtu edhe siç kërkohet në nenin përkatës të etiketimit në lidhje me eficientësinë e pajisjeve energjetike, sipas ligjit të eficientësisë së energjisë.

## **Neni 24**

### **Përjashtime nga taksat**

1. Çdo person që prodhon ose monton sisteme të paneleve diellore për prodhimin e ujit të ngrohtë do të përjashtohet nga tarifat doganore dhe TVSH për këto sisteme të paneleve diellore.
2. Çdo person që përmbush kërkesat e vendosura në nenin 23 do të përfitojë duke ju hequr taksat e mësipërme sipas pikës 1 të dhënë më sipër.
3. Çdo person që prodhon apo monton sisteme të paneleve diellore për prodhimin e ujit të ngrohtë për qëllime sanitare në ndërtesa apo për procese teknologjike në industri duhet t'i rimbursohet taksa doganore për lëndet e para të importuara për prodhimin apo montimin e këtyre sistemeve, me kushtin që sistemi i paneleve diellore i prodhuar të plotësojë kushtet e vendosura në nenin 25 dhe të provohet prodhimi apo montimi me faturë shitjeje.
4. Këshilli i Ministrave, me propozim të ministrisë përgjegjëse për energjinë do të miratojë rregullat dhe procedurat e rimbursimit për taksën doganore të paguar për lëndet e para dhe materialet e importuara për prodhimin ose montimin e sistemeve diellore të ujit të ngrohtë sanitar dhe për procese teknologjike.
5. Të gjithë prodhuesit dhe instaluesit e paneleve diellore duhet të raportojnë te Agjencia Kombëtare e Burimeve Natyrore, jo më vonë se 3 (tre) muaj nga data e prodhimit apo montimit, sasinë e paneleve që ata prodhojnë ose

montojnë, si dhe tipin e karakteristikat teknike të paneleve, të vërtetuara me faturë shitjeje.

## **KAPITULLI VI ENERGJI NGA BURIME TË RINOVUESHME NË SEKTORIN E TRANSPORTIT**

### **Neni 25**

#### **Parashikime specifike lidhur me shfrytëzimin e burimeve të rinovueshme të energjisë në transport**

1. Brenda 12 muajve nga data e hyrjes në fuqi të këtij ligji, Këshilli i Ministrave do të miratojë një rregullore të hartuar nga strukturat e Ministrisë së Punëve Publike dhe Transportit. Në këtë rregullore duhet t'i jepet informacion publikut për disponimin dhe përfitimet mjedisore nga të gjitha burimet e ndryshme të rinovueshme të energjisë, që përdoren në sektorin e transportit. Rregullorja duhet të parashikojë dhe detyrimin për të treguar pikat e shitjes ku përmbajtja e biokarburanteve, të tretura në nënproduktet e naftes, e kapërcejnë kufirin e vendosur në përqindje, sipas përcaktimeve të bërë nga ERE-ja.
2. Për qëllimin e demonstrimit të zbatimit të detyrimeve kombëtare për burime të rinovueshme të energjisë, që u janë vënë operatorëve dhe të objektivave për shfrytëzimin e burime të rinovueshme të energjisë, në të gjitha format që mund të përdoren në sektorin e transportit, të referuara në objektivat kombëtare për përdorimin e burimeve të rinovueshme të energjisë, në përputhje me nenin 4, të këtij ligji, kontributi nga biokarburantet e prodhuara nga mbeturina, mbetje, materiale celulozike joushqimore dhe materialet linjo-celulozike, do të konsiderohet të jetë dyfishi i asaj të prodhuar nga biokarburantet e tjerë.

## **KAPITULLI VII DISPOZITA TË FUNDIT**

### **Neni 26**

#### **Sanksione administrative**

1. Kur shkeljet e detyrimeve të përcaktuara në këtë ligj apo në aktet e tjera, të nxjerra në zbatim të tij, nuk përbën vepër penale, dhe, konkretisht, kur subjekti:

- a) shkel parashikimet e nenit 19 (2), ose
  - b) është në kundërvajtje me një urdhër të zbatueshëm, sipas neneve 13 (4) dhe 13 (5) të këtij ligji;
  - c) penalizohet për shkelje administrative, sipas legjislacionit në fuqi për kundërvajtjet administrative.
2. Shkelja administrative dënohet me vendosjen e një gjobe administrative deri në 500.000 lekë.
3. Autoriteti administrativ për ekzekutimin e kësaj gjobe do të jetë ERE.
4. Në rast se subjektet nuk paraqesin në AKBN:
- a) bilancin vjetor të prodhimit të energjisë nga burimet e rinovueshme;
  - b) nuk regjistrojnë dhe nuk raportojnë panelet diellore që instalojnë;
  - c) nuk përdorin pajisje të çertifikuara për shfrytëzimin e energjive të rinovueshme.
- AKBN-ja i propozon ERE-së vendosjen e gjobës sipas përcaktimeve të këtij neni
5. Të ardhurat që vijnë nga gjobat shkojnë në buxhetin e shtetit.

## **Neni 27**

### **Akte nënligjore**

1. Këshilli i Ministrave ngarkohet të nxjerrë aktet nënligjore në zbatim të këtij ligji të parashikuar në nenet 4, 7(1), 10(1), 11, 12, 15 (1), 24 (4) dhe 25 (1) të këtij ligji.
2. Ministria përgjegjëse për energjinë ngarkohet të nxjerrë aktet nënligjore për zbatimin e këtij ligji, të parashikuar në nenet 5 (1), 6(5), dhe 17(3) të këtij ligji.
3. ERE-ja ngarkohet të nxjerrë aktet nënligjore për zbatimin e këtij ligji të parashikuar në nenet 11 (4), 12 (1), 12 (3), 14 (5), 17 (1), 18 (8) dhe 18 (9) të këtij ligji.

## **Neni 28**

### **Hyrja në fuqi**

Ky ligj hyn në fuqi 15 ditë pas botimit në “Fletoren zyrtare”.

**K R Y E T A R I**

**JOZEFINA TOPALLI (ÇOBA)**